



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr.609, datë 11.09.2019

PËR

**CAKTIMIN E KRITEREVE DHE TË PROCEDURAVE TË
PËRZGJEDHJES SË PJESËMARRËSVE NË KAPITALIN E
OPERATORIT TË TREGUT**

Në mbështetje të nenit 100 të Kushtetutës, pikës 1/2 të nenit 57 të Ligjit nr. 43/2015, datë 30.4.2015 "Për sektorin e energjisë elektrike", të ndryshuar me propozimin e ministrit të Infrastrukturës dhe Energjisë, Këshilli i Ministrave

VENDOSI:

**I. KRITERET PËR ZGJEDHJEN E SUBJEKTEVE JURIDIKE TË CILAT DO
TË MARRIN PJESË NË KAPITALIN E OPERATORIT TË TREGUT**

1. Ministri përgjegjës për energjinë autorizon fillimin e procedurës konkurruese të për zgjedhjes së subjekteve juridike që marrin pjesë në kapitalin aksionar të Operatorit të Tregut në Shqipëri (përveç "Operatorit të Sistemit të Transmetimit" Sh.a, më tej referuar si "OST Sha".)

2. Ministri përgjegjës për energjinë dhe ministri që ushtron të drejtat e pronësisë mbi OST Sh.a ngrejnë me urdhër të përbashkët, Komisionin e Posaçëm i cili përbëhet nga 5 (pesë anëtarë) dhe ka përbërjen si më poshtë:

- (a) kryetari, nga ministria përgjegjëse për energjinë;
- (b) 1 (një) anëtar nga ministria përgjegjëse për energjinë;
- (c) 1 (një) anëtar nga ministria që ushtron të drejtat e pronësisë mbi OST Sh.a;
- (d) 2 (dy) anëtarë nga OST Sh.a.

3. Komisioni i Posaçëm ka këto kompetenca:

a) Harton, brenda 30 ditëve, dokumentet e procesit konkurrues, që specifikojnë mënyrën e zhvillimit të procesit konkurrues për përfitimin e masave mbështetëse;

b) Harton kritere të veçanta të aplikimit dhe të kualifikimit, bazuar në përcaktimet e pikës 15 të këtij kreu;

- c) Harton metodologjinë e vlerësimit, e cila është pjesë e dokumenteve të procesit konkurrues;
- ç) Vlerëson ofertat e ofertuesve bazuar në kriteret e kualifikimit të ofertës;
- d) Harton raportin përfundimtar të vlerësimit dhe e paraqet për miratim pranë ministrit përgjegjës për energjinë dhe ministrit që ushtron të drejtat e pronësisë mbi OST Sh.a;
- dh) Mund të angazhojë ekspertizë të veçantë vendase ose të huaj për të asistuar gjatë zhvillimit të procesit;
- e) Çdo funksion tjetër bazuar në parashikimet e këtij vendimi.

4. Procedura konkurruese e përzgjedhjes do të vijojë me publikimin nga Komisioni të njoftimit për shprehjen e interesit si dhe të afatit përfundimtar për shprehjen e tij, në të paktën:

- (a) një gazetë kombëtare;
- (b) buletin e njoftimeve zyrtare; dhe
- (b) dy gazeta ndërkombëtare.

5. Kostot dhe shpenzimet për procedurat konkurruese, përfshirë botimin në gazeta kombëtare dhe ndërkombëtare, hartimin e dokumentave standarde dhe asistencën e ekspertëve të jashtëm të specializuar (nëse do të jetë e nevojshme) do të përballohen nga pjesëmarrësit e përzgjedhur në përpjestim me aksionet e tyre. Në rast se nuk do të ketë asnjë pjesëmarrës të përzgjedhur, këto kosto do të mbulohen nga OST Sh.a.

6. Komisioni vendos në dispozicion të pjesëmarrësve të interesuar dokumentet standarde për pjesëmarrjen në procedurën konkurruese me kërkesën e tyre, sipas afatit të përcaktuar në Dokumentat Standarde.

7. Komisioni cakton një afat për paraqitjen e propozimeve nga pjesëmarrësit, i cili në asnjë rast nuk mund të jetë më i shkurtër se 4 (katër) javë nga shpallja sipas pikës 4 të këtij Kreu.

8. Dokumentet standarde të procesit konkurrues, ndër të tjera përmbajnë:

- a) formularin e njoftimit, duke përfshirë përshkrimin e projektit, kapitalin minimal, vlerën nominale të propozuar të aksioneve, përqindjen indikative të aksioneve të rezervuara për OST Sh.a, afatin për të gjithë procesin duke përfshirë periudhën e negociimit dhe afatin e nënshkrimit të projekt statutit dhe/ose projekt marrëveshjes së aksionareve;
- (b) udhëzimet për pjesëmarrësit;
- (c) kriteret specifike dhe të përgjithshme për pjesëmarrjen për çdo kategori (për Operatorë të tjerë të Sistemit të Transmetimit (TSO), për Operatorët me Eksperiencë Ndërkombëtare (OEN), për Pjesëmarrësit në Tregut të Energjisë (PTE) ose për Institucionet Financiare Ndërkombëtare (IFN));
- (d) formularin për deklarimin e konfliktit të interesit;
- (e) dispozitat e përgjithshme të projekt statutit të Operatorit të Tregut dhe/ose të projekt marrëveshjes së aksionarëve.

9. Në Dokumentet standarde të procesit konkurrues do të përcaktohet detyrimi si më poshtë:

(a) pas themelimit të shoqërisë, çdo transferim i aksioneve nga një pale të tretë që kërkon të marrë pjesë në kapitalin aksionar të Operatorit të Tregut, duhet të marrë pëlqimin paraprak nga OST Sh.a.. OST Sh.a në çdo rast do të marrë edhe mendimin e ministrisë përgjegjëse për energjinë e cila do të verifikojë përmbushjen e krieteve të aksionarit të mundshëm, në përputhje me Ligjin nr. 43/2015 "Për sektorin e energjisë elektrike" të ndryshuar, si dhe me interesin publik.

(b) në rast zvogëlimi të përqindjeve të zotëruara, të shkaktuar si pasojë e hyrjes së ndonjë aksionari të ri të Operatorit të Tregut pas themelimit të tij, ky zvogëlim do të prekë në mënyrë të barabartë pjesët e zotëruara nga operatorët e sistemit të transmetimit, të cilët do të jenë aksionarë të Operatorit të Tregut.

10. TSO-të duhet të përmbushin kërkesat e mëposhtme:

(a) të jetë një subjekt juridik i themeluar dhe i regjistruar në njërin nga vendet e Bashkimit Europian ose të Komunitetit të Energjisë;

(b) të jetë i licensuar si një operator i sistemit të transmetimit në shtetin ku është i regjistruar;

(c) në zonën e tregut ku vepron, nuk duhet të angazhohet në veprimtarinë e tregut të ditës në avancë ose të tregut brenda ditës (psh.ditë në avancë PX) i vetëm ose së bashku me operatorë të tjerë;

(d) të mos jetë në gjendje falimentimi apo likuidimi dhe të posedojë të gjitha autorizimet dhe miratimet e nevojshme për të hyrë në procesin konkurrues të përzgjedhjes.

11. OEN duhet të përmbushë kërkesat e mëposhtme:

(a) të jetë subjekt juridik i themeluar dhe i regjistruar në njërin nga vendet e Bashkimit Europian ose të Komunitetit të Energjisë, ose një vend që ka nënshkruar një marrëveshje ose një memorandum me Qeverinë Shqiptare për bashkëpunim në sektorin e energjisë dhe bashkëpunim në lidhje me TSO-të;

(b) të ketë më shumë se 5 vjet eksperiencë në kryerjen e veprimtarisë së operimit/menaxhimit të tregut të shkëmbimit të energjisë (të tregut të ditës në avancë dhe të tregut brenda ditës) në shtetin e tij dhe/ose rajonet përkatëse të veprimtarisë, ku zbatohen rregulla tregu të ngjashme me modelin e tregut të energjisë në Shqipëri; dhe/ose

(c) të zotërojë dhe të përdorë plotësisht një platformë të Tregut të Ditës në Avancë (DAM) të përshtatshme për Kombinimin Multi Rajonal (MRC – Multi Regions Coupling) të plotë, një platformë të përshtatshme për tregti ndër-kufitare brenda ditës (XBID) si dhe një platformë të situacionimit dhe kompesimit (clearing), ose të ketë përdorimin e kësaj të fundit;

(d) të provojë që rezultatet financiare të shoqërisë kanë qenë pozitive për 3 vitet e fundit.

(e) të jetë anëtar i plotë i Kombinimit Rajonal të çmimeve (PRC - Price Coupliong of Regions) dhe MRC, që të jetë në gjendje të ofrojë konceptin Europian Serviced PX dhe të ketë akses në algoritmin Euphemia; dhe/ose

(f) të jetë Operator i Emëruar i Tregut të Energjisë Elektrike në tregun e tij të brendshëm, si dhe të paktën në tregun e një juridiksion tjetër, për të treguar pranim dhe miratim të gjerë rregullator; dhe /ose

- (g) të ketë eksperiencë të provuar në fillimin dhe funksionimin e plotë tregjeve të përshtatshme për operim MRC në Bashkimin Evropian në drejtim të sistemeve të IT, procedurave të operimit dhe rregullave të shkëmbimit.
- (h) të mos jetë në gjendje falimentimi apo likuidimi dhe të posedojë të gjitha autorizimet dhe miratimet e nevojshme për të hyrë në procesin konkurrues të përzgjedhjes.

12. PTE duhet të përmbushin kërkesat e mëposhtme:

- (a) duhet të jetë subjekt juridik i cili është themeluar dhe operon në njërin nga vendet e Bashkimit Evropian ose të Komunitetit të Energjisë, ose në një vend që ka nënshkruar një marrëveshje ose një memorandum me Qeverinë Shqiptare për bashkëpunimin në sektorin e energjisë dhe bashkëpunim në lidhje me TSO-të. Në rast se marrin pjesë me shumë se një PTE, ato që janë themeluar në vendet e TSO-ve që janë aksionerë të Operatorit të Tregut, do të kenë përparësi në vlerësim;
- (b) duhet të jetë i pajisur me licencën përkatëse për aktivitetin prodhimit, dhe/ose tregtimit dhe/ose furnizimit;
- (c) duhet të ketë jo më pak se 5 vjet që është pjesëmarrës dhe operon në tregun e energjisë elektrike në më shumë se një nga vendet e Bashkimit Evropian dhe/ose Komunitetit të Energjisë, si shprehje e interesit dhe eksperiencës në tregun e energjisë elektrike;
- (d) Të ketë një volum minimal vjetor, të transaksioneve të energjisë elektrike mbi 100.000 MWh për 5 vitet e fundit.
- (e) të mos jetë në gjendje falimentimi apo likuidimi dhe të posedojë të gjitha autorizimet dhe miratimet e nevojshme për të hyrë në procesin konkurrues të përzgjedhjes.
- (f) Në rast se ka pjesëmarrje kapitali në projekte/aktivitete të tjera të lidhura me sektorin e energjisë elektrike, duhet të japë shpjegime të plota dhe shteruese si dhe një skemë organizative në lidhje me pjesëmarrjen e tij në kapitalin e Operatorit të Tregut, që të jetë e mjaftueshme për të garantuar shmangien e çdo konflikti interesi.

13. IFN duhet të përmbushë kërkesat e mëposhtme:

- (a) të jetë një institucion financiar i cili është themeluar kryesisht nga më shumë se një vend (por edhe institucione të tjera ndërkombëtare ose organizata mund të jenë aksionare të tij) bazuar në një traktat ose konvente dhe për këtë arsye është subjekt i së drejtës ndërkombëtare. Në rast se marrin pjesë më shumë se një IFN, institucionet në të cilat Shqipëria është anëtare do të kenë përparësi në vlerësim.
- (b) të japë shpjegime të plota dhe shteruese, si dhe të propozojë një skemë organizative të përshtatshme në lidhje me pjesëmarrjen e tij në kapitalin e Operatorit të Tregut, në rast se ka pjesëmarrje kapitali në projekte të tjera për prodhimin e energjisë, me qëllim shmangien e çdo konflikti interesi.

14. Kërkesat konkrete specifike që duhet të plotësohen nga pjesëmarrësit dhe dokumentet që duhet të vihen në dispozicion, përcaktohen në dokumentet standarde. Ato mund të përbejnë aspekte të detajuara të kërkesave të përgjithshme të parashikuara me sipër, por duhet të përfshijnë kërkesat e përcaktuara në pikën 15 më poshtë.

15. Kërkesat specifike që duhet të përmbushin pjesëmarrësit përbëhen nga:

(a) Kërkesat Ligjore: të cilat përmbajnë informacione lidhur me aspektet ligjore të organizimit të pjesëmarrësve si forma e shoqërisë, statuti dhe akti i themelimit, miratimet ose autorizimet e brendshme të shoqërisë në lidhje me pjesëmarrjen në procedurë, miratimet/licencat/autorizimet e autoriteteve publike apo enteve rregullatore, identitetin e përfaqësuesve ligjore, statusi ligjor dhe deklarata të tjera siç kërkohet dhe specifikohet në dokumentet standarde.

(b) Kërkesat Teknike: të cilat përmbajnë informacione lidhur me veprimtarinë tregtare të pjesëmarrësit, eksperiencën, projektet e ngjashme, zotërimin e njohurive dhe teknologjive, mjetet financiare, përshkrimin se si pjesëmarrësi do të kontribuojë në fillimin dhe zhvillimin e mëtejshëm të aktivitetit të Operatorit të Tregut.

(c) Kërkesat Financiare: të cilat përmbajnë informacione mbi shumën e kapitalit që do të investohet, një fashe të përçindjes së propozuar për nënshkrimin e aksioneve dhe shumën e pjesëmarrjes në kapitalin e Operatorit të Tregut, burimin e kapitalit, stabilitetin financiar.

II. PROCEDURAT PËR PËRZGJEDHJEN

1. Propozimet e pjesëmarrësve në procedurën e konkurrimit duhet të dorëzohen brenda afatit të caktuar në dokumentet standarde të publikuara. Secili pjesëmarrës duhet të paraqesë vetëm një propozim. Konsorciume, bashkim shoqërisë ose struktura të ngjashme me to nuk lejohen.

2. Përfaqësuesit e pjesëmarrësve në procedurën e konkurrimit mund të marrin pjesë në hapjen e propozimeve të paraqitura.

3. Komisioni cakton kohën, datën dhe vendin në të cilin do të bëhet vlerësimi i propozimeve.

4. Procedura e vlerësimit do të bazohet në një sistem vlerësimi me pikë, sipas metodologjisë së përcaktuar në dokumentet konkurruese dhe Komisioni do të shqyrtojë të gjitha dokumentet që përmban secili nga propozimet.

5. Për secilën kategori pjesëmarrësish si TSO-të, OEN-të, PTE ose IFN-të kryhet një procedurë e ndarë vlerësimi.

6. Komisioni ka të drejtë t'i kërkojë pjesëmarrësve informacione ose dokumente shtesë në mënyrë që të arrihet një vlerësim më i mirë në lidhje me përmbushjen e kërkesave. Dokumentet shtesë do të kërkohen vetëm për të qartësuar më mirë dokumentet e dhëna në ofertën e paraqitur. Në rast se kërkohen dokumente shtesë këto duhet të sigurohen brenda 5 (pesë) ditëve pune nga kërkesa.

7. Pas vlerësimit të propozimeve nga secili anëtar, Komisioni harton përmbledhjen e pikëve për çdo pjesëmarrës në secilën kategori dhe përgatit një renditje përfundimtare.

8. Në rast se më shumë se një pjesëmarrës ka të njëjtin numër pikësh, Komisioni shqyrton përsëri dokumentacionin që i përket këtyre pjesëmarrësve me qëllim që të identifikojë kombinimin më të mirë të përmbushjes së kritereve të përgjithshme dhe atyre specifike nga

këta pjesëmarrës duke marrë parasysh gjithashtu se si ky kombinim do të shërbente për qëllimin e themelimit të Operatorit të Tregut.

9. Pjesëmarrësi që ka rezultatin më të lartë do të jetë fituesi në kategorinë e dhënë.

10. Në bazë të renditjes së pikëve të marra, Komisioni mund të zgjedhë më shumë se një TSO (përveç OST Sh.a), OEN, PTE dhe IFN, për t'u kualifikuar si pjesëmarrës në strukturën e kapitalit, brenda përqindjes së aksioneve që janë rezervuar për atë kategori sipas legjislacionit përkatës, duke patur parasysh edhe përqindjen e propozuar nga ofertuesit e përzgjedhur në ofertën e tyre.

11. Komisioni, përgatit një raport përmbledhës për ministrin përgjegjës për energjinë dhe ministrin që ushtron të drejtat e pronësisë mbi OST Sh.a. Pas miratimit të raportit nga dy ministrat, Komisioni njofton fituesit për secilën kategori, sipas rastit. Raporti përmban:

- (a) objektin e procedurës së konkurrimit;
- (b) një përmbledhje të procedurës së ndjekur;
- (c) numrin e propozimeve të paraqitura dhe një përmbledhje të secilit propozim;
- (d) kriteret e vlerësimit të propozimeve dhe vlerësimin sipas këtyre kriterëve të çdo propozimi;
- (e) renditjen e pjesëmarrësve sipas vlerësimit nga Komisioni dhe pjesëmarrësit e përzgjedhur për secilën kategori.

12. Ministri përgjegjës për energjinë njofton OST Sh.a dhe pjesëmarrësit e përzgjedhur për të filluar negociatat për nënshkrimin e marrëveshjes së aksionareve dhe Statutit të Operatorit të Tregut.

13. Ministria përgjegjëse për energjinë njofton brenda 15 ditëve kalenderike për arsyet e skualifikimit pjesëmarrësit të cilët nuk janë përzgjedhur. Kundër vendimit të ministrisë për skualifikim, pjesëmarrësit kanë të drejtën e ankimit, brenda 5 ditëve kalenderike nga marrja e njoftimit të skualifikimit. Numri i saktë i aksioneve që do të nënshkruhen midis aksionerëve të përzgjedhur të kategorisë së TSO-ve (përfshirë OST Sh.a) do të negociohet mes tyre duke marrë në konsideratë përqindjen e aksioneve të propozuara nga secili TSO në procesin e përzgjedhjes. Në rast se aplikon vetëm një TSO (përveç OST Sh.a) dhe ky TSO i përzgjedhur nuk kërkon të nënshkruajë të gjithë pjesën e mbetur të kapitalit aksionar të rezervuar për kategorinë e TSO-ve e tjera, por vetëm një përqindje të caktuar të saj, si dhe pas identifikimit të përqindjes së aksioneve që do të nënshkruhet nga OST Sh.a, pjesa tjetër e aksioneve të kategorisë së TSO-ve që ka mbetur e pa nënshkruar, do të nënshkruhet nga OST Sh.a.

14. Brenda aksioneve të mbetura për IFI-të e mundshme, në rast se një IFI nuk nënshkruan të gjithë kapitalin aksionar në dispozicion, një IFI i dytë i cili plotëson kushtet, sipas renditjes do të ftohet për të nënshkruar. Në rast se IFI i dytë nuk pranon ose nuk ka ndonjë IFI tjetër të zgjedhur, mund të negociohet me IFI-n e parë përsëri. Në rast se asnjë IFI nuk nënshkruan të gjithë ose një pjesë të mbetur të kapitalit aksionar të disponueshëm për kategorinë e IFI-ve,

atëherë OST Sh.a, dhe aksionerët e tjerë të kategorisë së TSO-ve në rast se pranojnë, nënshkruajnë (dhe ndajnë në mënyrë të barabartë mes tyre) pjesën e mbetur të aksioneve të kësaj kategorie.

15. Brenda aksioneve të mbetura për OEN-të në rast se një OEN nuk nënshkruan të gjithë përqindjen e kapitalit aksionar në dispozicion të kësaj kategorie, atëherë pjesa e mbetur i ofrohet një OEN të dytë e cila i plotëson kushtet, sipas renditjes. Në rast se asnjë OEN nuk nënshkruan të gjithë ose një pjesë të mbetur të kapitalit aksionar të disponueshëm për kategorinë e OEN-ve, atëherë OST Sh.a, dhe aksionerët e tjerë të kategorisë së TSO-ve në rast se pranojnë, nënshkruajnë (dhe ndajnë në mënyrë të barabartë mes tyre) pjesën e mbetur të aksioneve të kësaj kategorie.

16. Brenda aksioneve të mbetura për PTE-të, në rast se një PTE nuk nënshkruan të gjithë përqindjen e kapitalit aksionar në dispozicion të kësaj kategorie, atëherë pjesa e mbetur i ofrohet një PTE të dytë e cila i plotëson kushtet, sipas renditjes. Në rast se asnjë PTE nuk nënshkruan të gjithë ose një pjesë të mbetur të kapitalit aksionar të disponueshëm për kategorinë e PTE-ve, atëherë OST Sh.a, dhe aksionerët e tjerë të kategorisë së TSO-ve në rast se pranojnë, nënshkruajnë (dhe ndajnë në mënyrë të barabartë mes tyre) pjesën e mbetur të aksioneve të kësaj kategorie.

17. Negociatat ndërmjet pjesëmarrësve të përzgjedhur dhe OST Sh.a nuk do të ndikojnë në kushtet themelore të marrëveshjes së aksionarëve dhe të statutit, siç janë publikuar në dokumentet standarde. Ministria përgjegjëse për energjinë mund të vendosë të ndryshojë vlerën nominale të aksioneve nëse kjo kërkohet nga aksionerët negociues dhe është vendimtare në arritjen e një marrëveshjeje ndërmjet tyre.

18. Marrëveshja e Aksionarëve dhe statuti do të ndryshohen për atë që kërkohet me qëllim që:

- i) të pasqyrojë ndryshimet e kërkuara ose të negociuara pas procedurave të konkurrimit;
- ii) të plotësojë të gjitha boshllëqet;
- iii) korrigjimin e gabimeve dhe mangësive.

19. Në rast se negociatat nuk përfundohen me nënshkrimin e marrëveshjes së Aksionarëve dhe statutit brenda një afati prej 180 ditësh, ministria përgjegjëse për energjinë mund të vendosë të ftojë për negociata pjesëmarrësit e tjerë që kanë marrë pjesë në proces në bazë të pikëve të vlerësimit të dhëna nga Komisioni. Në rast se nuk ka pjesëmarrës për një kategori të caktuar, ministria do të ri-hapë procedurat e përzgjedhjes dhe do të krijojë një Komision të ri sipas parashikimeve të Kreut I.

III. DISPOZITAT PERFUNDIMTARE

1. Ministria përgjegjëse për energjinë dhe ministria përgjegjëse për ushtrimin e të drejtave të pronësisë mbi OST Sh.a duhet të ndërmarrin hapat e nevojshme për emërimin e Komisionit sipas Kreut I të këtij vendimi.

2. Ngarkohen Ministria e Infrastrukturës dhe Energjisë dhe Ministria e Financave dhe Ekonomisë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

EDI RAMA

MINISTRI I INFRASTRUKTURËSDHE ENERGJISË

BELINDA BALLUKU